

Date – 06/10/2025

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizo hlang awmna tur Territorial Army chu Aizawl leh Lungleiah din tur ah vawiin atang hian Lunglei Kawmzawl ah sipai la tura inpuahchahna kalpui tan a ni a, a duh apiang in thu an zawtfiah thei a ni.
2. Mizoram a village council-ten kumin tangka kum kal mek a hman tur thawh hnihna cheng vaibelchhe 14 leh nuai 40 central sorkar in a rawn pe chhuak.
3. Election Commission of India chuan Bihar-a inthlanpui lo awm turah political party hrang hrang aiawhte a kawm.
4. Union Health Ministry chuan naupang kum 2 hnuai lam hnenah khuh leh hritlang damdawi pe lo turin thu a chhuah.

<><><>

TERRITORIAL ARMY

Mizo hlang awmna tur Territorial Army chu Aizawl leh Lungleiah din tur a nih angin vawiin atang hian Lunglei Kawmzawl ah sipai la tura inpuahchahna kalpui tan a ni a, a duh apiang in thu an zawtfiah thei a ni.

Indian Air Force ho awmna thinnaah battalion thar awmna tur hi dah a ni. Lt Col Prashant R Kakade chuan an hmalakna tur lian berah chuan Sipai, General Duty tur 70 lak an ni dawn a ti a, an zingah hian hmeichhia pawh lak tum a ni a, lak zat tur chiah erawh la tihchian loh a ni a ti. Tun tumah hian mi 70 lak an ni ang a, a dawtah mi 230 la lehin kum 2 chhungin mi 300 an la dawn niin a sawi.

November ni 10 leh ni 16 inkar chhung hian district tin pualin a indawt in Rajiv Gandhi Stadium, Aizawl Salem Veng Mualpui-ah sipai lak hi kalpui a ni dawn tih sawiin hemi atan hian Lunglei Dist, Siaha, Lawngtlai leh Hnahthial Dist te tan vawiin atang hian Pre recruitment rally chu Kawmzawlah buatsaih a ni ang a ti.

RG Stadium a tling te chu Shillong-ah Training pek an ni ang a, chumi hnuah hian sipai puitling an ni tawh mai dawn a. Territorial Army hi sipai puitling ang chiah niin tul leh mamawhah koh theih reng an ni dawn a, kum 7 an tan ngei ngei a ngai a, a tul dan azirin leh an nungchang azirin kum 30 thleng an service thei dawn a. Hlawh pawh a chhe lova, pension tha tak an dawng ang a, chhungkua leh khawtlang tan pawh mi tangkai tak an ni thei ang a ti.

Kawmzawl Lungleia TA Hqtrs. a Mizo awm chhun Naik Lalrinpuia chuan kum 2016-ah Teritorial Army- ah a lut a ti a, kum 15,17 leh 20-ah pension a theih tih sawiin service laia thi te chu SBI atangin cheng nuai 50 an dawng thei tih sawiin nuai 50 dang pawh Bajaj Insurance atanga dawn leh tur a awm tih a sawi. Tun tum hi Mizo tan territorial dinna tur hmasa ber a ni a, Indian Army dang ang bawkin hamthatna an dawn a inang vek a, CRPF leh BSF ai pawhin a tha zawk a, thla tin

cheng sing 6 chuang an la thei a, chuvangin Mizo thalai ten ngaihven ngei a tha a ni a ti.

<><><>

CAG: PWD

Comptroller & Auditor General of India (CAG) report hnuhnung ber chuan Mizoram PWD-in Chhiahtlang leh Lamchhip inkar kawng siamthatna hna a thawhna-ah cheng vaibelchhe 1 leh nuai 67 rinhlelhawm leh fel lo takin an hmang niin a sawi.

Audit report a a lan dan chuan Ministry of Road Transport and Highways (MoRTH) chuan kum 2016 September thla khan central road fund scheme hnuai-ah he kawng thawmthatna atan hian cheng vaibelchhe 66 leh nuai 68 a rawn sanction a, e-tender hmanga kalpui turin a rawn ti kher a. CAG-in PWD thil chhinchhiah a endikna-ah thil tihdan kaphung lova kalpui tam tak a hmuchhuak a. Hemi atan hian Mizoram sorkar chuan kum 2017 February thla khan cheng vaibelchhe 66 leh nuai 68 hmanga hnathawh remtihna (administrative approval) a pek a. Chief Engineer (Roads) chuan he hna thawhna atan hian cheng vaibelchhe 60 leh nuai 46 a sanction a. Sorkarin hnathawk tur a pawm hma hian kum 2017 January thla khan PWD chuan restricted tender an lo chhuah a. Contractor an thlan chu kum 2017 April thla khan hna pek a ni a, cheng vaibelchhe 62 leh nuai 16 seng tura hna hi pek a ni a. Kum 2019 February thla khan sum hman tur hi ennawn sak a ni a, cheng vaibelchhe 64 leh nuai 16 a tihsansak a ni a. Kum 2017 June thla atanga hna hi thawh tan niin kum 2021 September thla khan thawh zawh a ni.

Kum 2022 khan contractor chu running bill pasarih hmangin cheng vaibelchhe 22 leh nuai 96 pek a ni a. Kum 2018 September ni 25 khan hna enkawltu PWD Division hotute leh contractor-te inhmukhawmna-ah contractor chuan a kawng laih hrim hrim a zawhfel tawh thu a sawi a. He ti chung hian kum 2022 November thla khan PWD chuan kawng laih hi an teh tha leh a. Hei hi hna thawh zawh hnu kum 4 a nih bakah a vai a zawhfel hnu thla 14-ah a ni. Tlai khawhnu a an teh nawn leh hnu hian laih belh tura bituk a ni a. Kum 2023 August thla khan final bill atan cheng vaibelchhe 1 leh nuai 67 pek belh leh a ni.

CAG-in a ngaihndan chuan hetiangah teh nawn leh hi tihdan phung kalh a ni a, a chhan chu kawng laihna kha a hma-in paihfai vek tawh a ni si a. Chu bakah ram laknate, leiminte leh e-tender hmanga hna inpek hnu a tihdanglam lehna chungchangah te engmah ziaka dah a awm lova. Chuvangin CAG report chuan kawng laih teh nawn leh a nih avanga cheng vaibelchhe 1 leh nuai 67 sen belh hi sum sen dan dik lo takah a ngai a ni.

<><><>

RTI

India khua leh tui tupawhin sorkar thuneitute kawlt information-te dan hmanga a taka an neih theihna Right to Information Act, 2005 hmangin mipuiten kuminah Mizoram Online RTI kaltlangin Mizorama sorkar department/office/board hrang hrang hnenah zawhna 6,572 an zawt tawh a; tun thla kal mekah ni 4 chhungin Online RTI-ah hian zawhna 96 a lut tawh.

Mizoram Information Commission tarlan danin, RTI Act Second Schedule hnuai-ah ram venhimna kaihnawih thilte chu mipuiin information an dil theih zingah ngaihnathiamna (exemption) pek an ni a. Exemption pek zingah hian central

sorkar hnuai intelligence leh security organisations 22 an tel a, Mizoram sorkar hnuai exemption pek zingah hian CID Special Branch, District Special Branch leh Narcotic Cell-te bakah, thubuai chhui lai tibuai thei turte a tel.

Exemption pekte leh a thawktute hi eirukna kaihnawih leh Human Right bawhchhiatna lam thilah chuan RTI Act hnuai hlahthlem an ni bik lo thung.

Mizoram Online RTI hi kum 2022 July thla khan hawn a ni a; kumin bikah January ni 1 atanga vawiin October ni 4 thleng hian Online RTI kaltlangin zawhna 6,572 a lut tawh a, tun thla kal mekah ni 4 chhungin zawhna 96 a lut tawh bawk.

Chief Information Commissioner Pu John Neihlaia chuan Information Commission, sorkar hnathawk leh mipuite chu RTI Act hman tangkai leh zual a nih theih na'na tan la zel turin a chah a ni.

<><><>

RLB FUND

Central sorkar chuan tun hnai khan Mizoram a village council-te tan kumin tangka kum kal mek a hman tur thawh hnihna cheng vaibelchhe 14 leh nuai 40 a rawn pe chhuak.

Ministry of Panchayati Raj thuchhuahin a sawi danin tuna VC-te tana cheng vaibelchhe 14 leh nuai 40 pek chhuah hi Finance Commission 15-na 'untied grant' atanga pekchhuah a ni a. Hemi rual hian tangka kum hlui (2023-24) chhunga untied grant thawh khatna hrensak cheng nuai 12 leh sang 9 a rawn pe chhuak tel bawk. Tuna sum pek chhuah hi a dawng thei tur VC 808 dawn tur a ni a. A hma hian August thla khan cheng vaibelchhe 14, nuai 27, sing 6 leh sang 1 chu VC 827 te hman tura pekchhuah a ni tawh bawk a, hei hi 2023-24 tangka kum ami kha a ni.

Panchayati Raj Ministry leh Jal Shakti Ministry (Department of Drinking Water & Sanitation) chuan rural local body (RLB) leh panchayati raj institution (PRI) te tana Finance Commission 15-na sum ruahman hi pe chhuak turin rawtna a siam a, chumi zulzui chuan Finance Ministry chuan instalment 2 chu tangka kum kallai-ah a pechhuak ta a. 'Untied grant' an tih mai hi VC-te leh PRI te'n a khaw bikin an mamawh ang zela thil hrang hrang 29-a hmasawna hna an thawhna atana ruahman a ni a. 'Tied grant' an tih chu mipui nitin mamawh zual bik - thianghlimna lam leh pawn lera inthiar awm lohna vawn reng theihna atan leh chhungkaw tinin an bawlhhlawh leh thil hrang hrang senghawi a sawngbawlana atan te, tui pekna, ruahtui khawlana leh tui hman hnu hman tangkai zui zel theih tura sawngbawlana atan te ruahmanna bik a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CEC

Chief Election Commissioner Gyanesh Kumar chuan Bihar Assembly inthlan hun puan thuai a ni ang a ti. Nimina Patnaa chanchinbumite kawmin Pu Kumara chuan Election Commission chuan Political Party te nen pawh inkawmna hun an neih thu sawiin an ngaihdante lak a ni a ti a. Kil hrang hrang atanga rawtna awmte ngaihtuah a nih thu a sawi. Election Commission hotute hian ni hnih chamin Bihar Assembly inthlan inbuatsaihna hi an endik a. Pu Kumara chuan Special Intensive Revision chu dan anga kalpui anih thu a sawi bawk a ni.

<><><>

EAM

External Affairs Minister Dr.S Jaishankar chuan tunhnaiah ram leh ram indo dan chuan danglamna tam tak a tawh tih a sawi a. Ralthuam changkang tak tak hmangin mihring inrawlh ngai loa indona kalpui anih tawh thu sawiin technology thar ber ber hman a ni a ti a. New Delhi-a Kautily Economic Conclave ah he thu hi sawiin Pu Jaishankara chuan hetiang dinhmun inthlak mekah hian India chu nghet taka dingin tualchhungah an indinchho mek a ni a ti a. Ram dangte nen inpawhna tha siam turin theihtawp chhuah anih thu sawiin India leh US inkara sumdawna chungchangah pawh inbiakna neih mek a nih thu a sawi .

<><><>